



樂清縣誌  
(光緒)  
一

版藏尊經閣

樂清縣志

謝筆馬元以題

光緒辛丑  
季冬工竣

重修樂清縣志序

粵自楚臣能讀三墳八索之書周官實辨六典九服之治龍節虎節達山澤之宜訓方形方制邦國之體金簡探策則禹益傳經玉海長瀾則桑鄺記水應仲遠之風俗通義楊子雲之輶軒方言並著洽聞傳之後代縣義娥而耀景蔡竹帛以騰文不獨吉甫十道之圖元豐九域之志爲地理之嚆矢肇邑乘之權輿已也樂清僻在海濱舊總甌越回浦章安之建置臨海永甯之分析雲門張樂簫臺吹笙文君隱處之鄉謝客盤遊之地美其疆土跨榴嶼與柗溪偉其山川

卓龍湫於雁蕩王忠文之對策鸞鳳赤霄章恭毅之  
直言風霜清節文傳二谷自折弇州之心亭仰三高  
不數吳門之躅區域之勝如此人物之茂如彼則有  
淳熙己亥之編大德甲辰之紀內史外史具見端崖  
班書范書猶存髣髴元明之易代徵隆慶之前修  
皇朝闡珍寰海同鏡載述遺烈兩振芳塵金匱石室之藏  
理資來哲夕秀朝華之啓義取隨時

聖天子重光赤奮若之年邑人鄭寶卿洪舟卿諸君追逸  
驥於風雲麗雕龍於綈槩發凡起例全提虎觀之綱  
徵實秉公默契麟經之旨搜羅故事採訪軼聞懋厥

典裁哀然成集余適奉檄來權是邦期年單父之琴  
曷月揚水之詠持書索序臨別贈言今夫五紫一素  
者表正則景直也扶麻漸芷者習貫則性成也人智  
人武南北殊方士肆士拘周秦異教文翳化蜀江漢  
炳其英靈管仲相齊海岱被其冠履用上化下草偃  
風行若其起累土而崇成臨深谿而知厚隲楮之木  
可以爲輪琢磨之玉可以爲器千灌萬辟乃有神劍  
之鋒書肆說鈴要諸聖人之道今者胡星彗孛世運  
凌夷晦風雨而鳴雞筆荆榛而啟路不昌正學曷鬯  
華風熏五步之芬芳存十室之忠信和親康樂蒸善

良以登書正德厚生薦純龐於比戶所蘄同志共亮  
斯文至於職官政賦之方禮教物產之數奔石海錢  
之異詎那梅塔之靈杼軸羣言旁薄萬彙孕鴻濛於  
岡外正證太平寰宇之篇緝藻縟以開耑庸叙孝侯  
風土之記

賜進士出身

誥授朝議大夫刑部山西司主事浙江截取知縣署理溫  
州府樂清縣衡山李登雲撰

重修樂清縣志序

光緒辛丑冬十月

寶鎔

奉檄至温州權知樂清縣事樂清

諸君子方取舊志而重新之不以

寶鎔

爲不文也而乞爲

之序嗚呼民生之困至今日而極矣風俗之頹敗物產之  
消耗地有遺利而不知興人有餘力而不知用患貧患弱  
不惟爲

朝廷憂亦且爲山川羞而其患皆由於吏治之不修夫吏  
之初亦齊民耳或以科舉或以貲入其志行豈必盡異於  
庸流而以之寄百里之命則任大責重於古封建時一公  
侯大邦也

寶鎔

下車三月百廢待舉漸有以副上台之委

任者昕夕旁皇必有以待我樂清之民者自慙其涓埃之  
無補也攷樂清戶藉七萬一千男女三十三萬三千其人  
民不爲少矣貧富貴賤強弱媺惡之不齊而待治於一合  
或非智慮所能周然苟存父母斯民之心則饑飽苦樂之  
殊情而求得其所體諸身而無不切也秀頑良樸之不同  
類習俗好尚或交蔽以歧其趨而教有不行里胥社長或  
舞智以撓吾法而澤有不逮然苟懷哀矜惻怛之念則寬  
嚴威惠之殊用而悉畏其神盡吾誠而無不格也法律科  
條之布在合甲或紛紜繁賾而不可窮然苟達其意而不  
泥其迹則令之所及者吾無窒焉令之所不及者益得以

展吾志行以簡而無不通也讀古人之書而師其意攷先  
賢之成法而因時地以制其宜尙不至層累隔閼去民遠  
而未由下究也顧自王忠文於梅溪倡道砥礪儒修朱考  
亭三至是邦聚徒而講道有小鄒魯之稱其流風餘韻猶  
有存者今諸君子方取舊志而重新之竊喜文獻之足徵  
藉以佐治理之不逮也夫居其位莫舉其職坐視風俗之  
頽敗物產之消耗無道焉以拯之是地方有司之責也旣  
志吾媿亦以正告樂清之爲士者使聞吾言而興起窮則  
獨善達則兼善不更有以增邑乘之光乎

光緒壬寅孟春權知樂清縣事吳縣錢寶鎔譔



補刻樂清縣志叙

樂清浙東僻縣也在漢屬回浦永甯自晉迄唐稱樂成五代以後改名樂清其山玉甌雁蕩其水象浦檉江其土瘠而民苦貧其俗儉而士好義然聞宋之中世吾邑儒術始盛東平萬府君鹿巖賈司理白石錢孝廉以行顯梅溪王忠文父子繼世爲名臣錢宗卿文季著作季莊以學顯至元有李著作之宏文明有朱徵君之高節而章侯二家尤累世科第不絕勲業詞章後先濟美清初史明經學宗攷亭戛戛獨造雍正以還邑令唐公興教立學崇祀梅溪儒風漸廣雖科名宦業之盛不及前代而服詩書守繩墨安

儒素者所在而有此豈一日事哉夫民俗之媿惡關乎治化之醇漓而實關乎學術之得失倡者一二人和者數百輩風動於一時而效及於數十世就樂清今日觀之水利興而地不瘠倉儲備而民不貧凡昔時尚鬼惑風水崇浮屠之俗與夫溺女停柩鬥訟喧囂無禮之風固已稍稍變其初而改其舊民盡知方士咸勵節孰使之然耶微紹興以來諸儒積數百年涵濡漸摩之功則樂清安有今日耶語曰前事之不忘後事之師也在則人亡則書前人勗其業而後人勿爲述之非所以繼志也前人筆諸書而後人勿爲傳之非所以闡幽也邑志始宋淳熙袁氏繼以元大德

馮氏今俱佚不傳傳者明隆慶侯氏清康熙徐氏道光鮑氏諸書光緒丙戌吾邑陳厚石先生取舊志續修之博采前聞益以近事彙輯爲編分邑里規制學校田賦兵制職官人物選舉經籍金石災祥寇警方外雜志九十四門體例視鮑志互有異同未成而卒辛丑陳君詠香倪君楚湄續行參訂校勘得二百餘條旣竟以授印無資乃止今夏縣議長周君開宗就商知事張公籌資三百金重行授印屬予覆校之閱月葢事旣圉校勘記於其後復爲序其端因論吾邑南宋以來諸儒之學實有振起數百年民俗之功後之人固未可淡然忘之而修是志者能述前人之業與

續訂是志者能傳前人之書二者殆皆有得於諸儒之學  
而留意於地方者歟

民國元年壬子秋邑人高 誼撰

樂清縣志總目

卷之首

序錄 姓氏 凡例 輿圖

卷之一

邑里志一 邑始 星野 形勝 邑境 隅都  
衝要

卷之二上

邑里志三 敘山

卷之二下

邑里志三 敘水 水利 古蹟 塚墓

卷之三